

中華文史叢書之十三
鉛印
王有立主編

殊域周咨錄

(二)

嚴從簡撰



據國立台灣大學
圖書館藏本影印

台灣華文書局印行

殊域周咨
錄二十四卷

于默署首



十九年五月故宮博
物院圖書館印行

殊域周咨錄題詞

夫男子始生懸桑弧蓬矢以射四方志有事也夷戎蠻狄不出覆載孰非四方之極而爲男子所有事者乎粵自王者無外殊疆一統故伊尹定四夷獻令正東越漚剪髮文身令以魚皮之鞮蛟賊利劍爲獻正南甌鄧柱國百僕九菌令以文犀翠羽菌鶴矩狗爲獻正西崑崙狗國關耳貫胸令以白毛紕罽龍角神龜爲獻正北空同大夏莎車代翟令以白玉良弓騶駼馱馱爲獻是豈聖人斥疆土寶遠物哉亦以德威所感凡有血氣共惟帝臣焉耳然一來一往禮無不答則所以口啣天語身駕星騏報聘宜拓傳綸綍之溫煦布聲靈之赫濯而使中國常尊外夷永順固使者職也比男子有事其責不更重且切耶由是則遐覽旁通以備將命於上采風於下者自當無所不周矣明興文命誕敷賓廷執玉之國梯航而至故懷來綏服寶冊金函燦絢四出而行人之轍遍荒徼矣我聖祖之勅本司有曰稽道里之遐邇識其緩急驗其辭色進退節度規矩弗移斯聖謨也夫

豈爲我中邦之使告哉凡以訓承巽外域者耳蓋方今天下車書混同驛路有版藉儀禮有注式皇華屈止雍容委蛇導揚休命罔不承聽所謂節度規矩不繇而中者也惟彼夷酋言語不通心志叵測王人往臨恪順威旨者雖云其常而間有匪茹反覆狡獪二心或以脅羈如西域之於傳安或以利誘如高麗之於祁順狹許多端變生俄頃則我所以守正出奇剛不取禍柔不取辱以萬全天子之委重者其急緩辭色誠不可不慎皇祖訓勅之旨良有以哉曩予備員行人竊祿明時每懷靡及雖未嘗蒙殊域之遣而不敢忘周咨之志故獨揭蠻方而著其使節所通俾將來寅案或有捧紫誥於丹陛樹琦節於蒼溟者一展卷焉庶爲辭色進退將命採風之一助也然其間勘討之畧守禦之策列聖威讓之謨諸臣經畫之論隨事具載雖以著一國之始終要亦官守所係不可缺焉何者蓋行人奉使條例其凡有九而有曰軍務者有曰整點大軍者則武事乃居其二非特司禮文之末而已況國家每有征伐必以行人爲之先諭故太祖欲征緬

卷之九

旬則遣李思聰詔其罷兵成祖欲討安南則遣朱勸許其贖罪以干戈取之而不足以口舌代之而有餘君子稱行人之職與將帥相爲表裏亶其然矣豈可曰軍旅之事吾未之學邊疆之籌吾未之任而漫焉廢講哉乃備錄之而并附其詩文道里風俗土產之類非徒誇文炫武而實服膺聖祖之訓周爰詢度猶恐有遺識焉耳但是錄之作昔合爲使職文獻之外編今因板泐重校分爲一書名曰殊域周咨以畀我僚之便覽云僻居陋巷不能廣致群籍是以不免掛一漏萬所賴大雅君子惠賜斧教訂誤補缺俾成一家之言則就正之心固所願也敢自是哉敢自足哉萬曆甲戌正月元日前行人司行人刑科右給事嘉禾紹峰于嚴從簡識於後濂精舍

按是錄所輯多今時事而畧於古者何哉蓋自漢唐以來各夷自有成史不必再贅故但揭其大綱以見立國之由可也若我朝之撫馭各夷審其文典藏諸私館世莫易窺有苟散見於各帙者必盡著之以表國


家章程之大以博臣工經畧之猷祇懼其語焉不詳未論其擇焉不精也至其中有雜說一二亦以原非正史聊廣見聞如賓筵鼎俎之外侑以螺頭龜脚叅錯成味俾覽者解頤不至端冕而聽惟恐其臥也乎

殊域周咨錄序

古之善謀人國者莫不以鑒於成憲爲急務故魏相好觀故事蘇環多識舊章至富弼則請選官將三朝故典分門類聚編成一書俾爲模範皆是意也況於制禦夷狄其關係治道尤大能不遵先王之道而可無過者否矣粵我二祖列宗內既順治外自威嚴九夷八蠻梯航承德而其所以懷柔之者不越乎文告之脩威懷之令而已文告則責諸使臣其間招徠有術宣對異宜剛柔變化幾不可測若沈秩之諭渤泥者是已威懷則責諸帥臣其間經略有方戰守異勢情僞緩急間不容髮若張輔之征交趾者是已至於鄭和以使往西洋而戮其叛王毛伯溫以帥討登庸而受其款塞則二者又交相爲用其成憲昭然皆可鑒也頃者諫議姪紹峯子携所著殊域周咨錄爲餽且敦乞叙言予閒中閱之乃知其行人時手輯名以周咨者因靡及之懷勤採訪之博蓋專以備使臣啣命外邦之猷而帥臣敵愾干城之策亦具焉予因論國家纖芥之恙在東南莫狡於日本在西

北莫蔓於靺虜日本之通初倚使臣故自宋蘇卿爭貢之後獻琛效順金
戈久偃而王直一旦蠢動海上禍延四省暴骨如莽斯時也材官之糾練
芻餉之盈縮以致添將增城朝廷按祖宗靖虜之藉而參定之卒致蕩平
靺虜之定惟倚帥臣故自土木遣使以來烽火多警星輶久絕而俺答悔
禍祈求通市疑信莫持郊勞難保斯時也馬價之高下犒賞之豐非以致
列爵賜冊朝廷按祖宗封倭之典而揆制之迄今向化予以是益信文告
威懷交相爲用而又知南倭北虜互藏其馭者矣推之各夷何有哉顯謨
遐軌繼志述事其善如此且予幸際聖明有道守在四夷謬叨冢宰之重
任謀保金甌之萬全固願得言重三軍勝決千里之臣以任之且示爾典
常作之師也則欲于大明會典之外如魏相蘇環條列故章上之當寧以
爲百官承式之考而政務至殷故未遑耳我姪斯錄也雖於祖宗之耿光
大烈未克兼摠其全若于富弼之請門類分編則豈非爲天下九經中柔
遠人懷諸侯之模範哉故喜其有合予旨而序之時萬曆癸未三月吉旦

賜進士第資德大夫正治上卿吏部尙書滇浙居士寅所嚴清撰



殊域周咨錄總目

一卷

朝鮮

二卷之三卷

日本

四卷

以上皆東夷

琉球

五卷之六卷

安南

七卷

占城

八卷

眞臘

暹羅

滿刺加

爪哇

三佛齊

渤泥

總目

瑣里古里

九卷 以上皆南蠻

蘇門答刺

錫蘭

蘇祿

麻刺

忽魯謨斯

佛郎

機 雲南百夷

十卷

吐蕃

十一卷

拂菻 榜葛刺

默德那

天方國

十二卷

哈密

十三卷

土魯番

十四卷

赤斤蒙古

安定阿端

曲先

罕東

火州

十五卷

以上皆西戎

撒馬兒罕

亦力把力

于闐

哈烈

十六卷之二十二卷

韃靼


二十三卷

兀良哈

二十四卷

以上皆北狄

女直



殊域周咨錄卷之一

皇明行人司行人刑科右給事中嘉禾嚴從簡輯

東夷

禹貢曰祗台德先東漸於海君奭曰海隅出日罔不率俾則知溟渤之區雖非正朔所加要皆文德所徠自古稱藩獻珍者已極隅夷之外尙已肆觀隋宋如裴世清使倭奴而有儀仗郊迎之盛錢勰使高麗而却金器四千之餉矯矯二星迹震東表名揭方冊猗歟休哉仰惟大明當天窮荒極壤咸在照臨而海中諸蕃春先得於陽谷氣早回於扶桑其所被帝德光華比之他國爲獨渥焉行人乘帆而至絲綸一布拜舞懽呼如太陽東升而金礫沙明霞光電閃川鳴谷響海水立而海若藏也然則使者其捧日之雲乎哉雖曰鯨波萬頃蜃氛千里時多不測所仗天子神威馮夷先驅天吳效順百靈秘怪呵護畢出又何足爲皇華虞耶故採其方域正宋則有若朝鮮有若日本東南則有若琉球而皆東

方之夷錄分四卷以爲啣詔青澥者之博喻也叙東夷

朝鮮

朝鮮周封箕子於此同三恪不臣朝鮮云者以其在東取朝日鮮明之義也秦屬遼東漢初燕人衛滿據其地武帝平之置眞蕃臨屯樂浪玄菟四郡漢末公孫度開府行牧事於遼東并有其地三傳而爲魏所滅晉永嘉之亂扶餘別種酋長高璉入據其地稱高麗王居平壤城始列化外唐征高麗拔平壤置安東都護府其國東徙距鴨綠江千餘里五代唐時王建代高氏闢地益廣並古新羅百濟而爲一建都松岳以平壤爲西京其後子孫遣使朝貢於宋亦常朝貢遼金歷四百餘年其主未始易姓元至元中西京內屬置東寧路總管府畫慈嶺爲界入本朝太祖高皇帝洪武元年列聖廟號俱一揭於此卷餘以年號爲紀遣符寶郎僕斯奉璽書賜高麗國王顓書曰自有宋失馭天絕其杞元非我類入主中國百有餘年天厭其昏淫亦用殞絕其命華夏潑亂十有八年當群雄初起時朕爲淮右布衣暴兵忽起悞入